

OHR počinje pripreme za tranziciju

Visoki predstavnik, Paddy Ashdown, ove sedmice će najaviti korake kojima će se unijeti promjene u strukturu Ureda visokog predstavnika, tako da će ubuduće ovaj Ured sve više biti koncipiran u svjetlu predstojeće tranzicije ka Uredu specijalnog predstavnika Evropske unije. Ova promjena je u skladu sa preporukama koje je dalo Vijeće za implementaciju mira na zadnjem sastanku održanom u Sarajevu u junu ove godine i sa stalnim pomacima koje BiH čini u procesu prelaska iz faze stabilizacije mira prema evropskim integracijama.

OHR je uvijek i bio privremena misija, koja je imala za cilj da osigura implementaciju odredbi Daytonsko-pariškog mirovnog sporazuma.

“Drago mi je da smo došli u fazu kada možemo početi sa planiranjem predaje ovlasti institucijama BiH i stalnim međunarodnim institucijama kao što su EUSR i EK, kao što se dogodilo i u drugim državama koje prolaze kroz proces oporavka”, rekao je danas visoki predstavnik.

Visoki predstavnik je naglasio da ova tranzicija podcrtava dugoročno opredjeljenje međunarodne zajednice prema BiH. BiH se nalazi na pragu pokretanja pregovora o stabilizaciji i pridruživanju i sudjelovanja u Partnerstvu za mir – prema tome, međunarodna zajednica mora biti pripravna da izmijeni prirodu svoje zastupljenosti u BiH, kako bi time odražavala pomake koje je BiH načinila.

Koraci koji će se preduzeti u toku ove godine podliježu odobrenju Vijeća za implementaciju mira i odražavat će pomake koje je načinio OHR u realizaciji svoga Plana implementacije misije.

Planirane promjene predstavljaju ključni element u procesu planirane tranzicije ove organizacije iz OHR-a u EUSR; brzina kojom će se ovi koraci poduzimati bit će u skladu sa stvarnim pomacima koje načini BiH. Ona će zavisiti od sposobnosti institucija BiH da vode reformske napore u procesu dovođenja BiH čvrsto na put ka Evropi.

Visoki predstavnik održava sastanke sa osobljem svih OHR-ovih glavnih ureda radi pojašnjenja plana tranzicije. Osoblje OHR-a je već smanjeno za više od jedne trećine u odnosu na period u 2002. godini kada je bilo najbrojnije, dok je budžet za 2005. godinu, koji iznosi nešto ispod 17 miliona eura, značajno umanjen u odnosu na prošlogodišnji, kada je iznosio 21 milion eura. U prijedlogu budžeta za 2006. godinu predviđa se dalje smanjenje za još 19 posto, na iznos manji od 14 miliona eura.

Konačan ishod ovoga procesa bit će važna prekretnica u razvoju BiH, odnosno trenutak kada BiH u potpunosti svoju sudbinu uzima u sopstvene ruke i kreće se odlučnije naprijed ka snažnijoj integraciji u EU.